

Lauxsae Lajmbanj Mbouj Yungzheih

乡村老师不容易

□ Mungz Niingz / 蒙宁

Mboengqgonq, loq miz di hoengq, hwnj muengx bae yawj lundanz, youq gwnz lundanz yawjraen haujlai cwnqqlwnh gvendaengz lauxsae. Gyoengq cwnqqlwnh haenx, mizdi gangj daengz lauxsae sinhoj lai, mizdi gangj daengz lauxsae soeng lai, lij miz vunz gangj daengz lauxsae seizneix baenzlawz baenzlawz la, mwngz coenz gou coenz, gangj ndaej gig sarwz.

Gou dwg baux lauxsae lajmbanj ndeu, ngoenznaengz cungj youq lajmbanj guh gij hong son saw, gangj daengz lauxsae lajmbanj, goulau cijmiz dou cungj vunz neix, cij miz swhgwz bingz aen cizyez lajmbanj lauxsae lo.

Vahsug gangj: Guh gijmaz rox gijmaz, gek hangz he couh lumj gek goengq bya ndeu. Gyoengq lauxsae lajmbanj dou, caen mbouj lumj mbanj vunz gangj yienghhaenx, hong soeng lai lo, baenzngoenz cij hwnj song sam dangz goq, gizyawz seizgan couh mbouj yungh guh gij saeh wnq lo; engq mbouj lumj mbanj vunz gangj yienghhaenx, gyoengq lauxsae seizneix simdoeg lai, doengh mbouj doengh couh fadceih hagseng, gij cizyez daudwz cungj vut caez lo.

Gangj dahraix, guh baux lauxsae lajmbanj saedcaih mbouj yungzheih bw! Lauxsae lajmbanj dwg lauxsae, yaek hawj hagseng son saw; lauxsae lajmbanj dwg canghyw, yaek hawj hagseng caz bingh; lauxsae lajmbanj dwg baujanh, yaek guenj hagseng ndei, baujcwng hagseng ancienz; lauksae lajmbanj dwg baujmu, yaek liuhleix hagseng gwndaenj; lauxsae lajmbanj dwg canghdajcawj, yaek bang hagseng dajcawj gijgwn. Ei, cien coenz fanh gawq, gyoeb baenz gawq vah ndeu—seizneix guh baux lauxsae lajmbanj mbouj yungzheih lo.

Gangjnaeuz lauxsae lajmbanj dwg canghyw, dwg aenvih lauxsae lajmbanj ngoenznaengz daengz hagdangz, gienh saeh daih' it couhdwg bang hagseng rau ndangraeuj, neix dwg veiswngh bumwnz gvidingh aeu guh. Leixyouz dwg: Hagdangz vunz lai, dwg gizdieg yunghheih fat bingh. Danghnaeuz laeuh saek ngoenz mbouj bang hagseng rau ndangraeuj, dinglingz miz saek baux hagseng ndangdaej fatndat, mbouj ndaej gibseiz soengq bae yw, caux baenz gij hougouj mbou ndei, byawz hix fucwz mbouj ndaej.

Gangjnaeuz lauxsae lajmbanj dwg baujanh, dwg aenvih lauxsae lajmbanj yaek gamguenj hagseng youq ndaw hagdangz ancienz. Danhfanz hagseng youq ndaw hagdangz fatseng gijmaz saehcingz, lumjnaeuz doxmoeb, doeklaemx, youq gwnz loh daeuj hagdangz caeuq baema ranz gojnwngz miz yungyiemy yawj mbouj raen haenx, cungj aeu lauxsae louzsim bae guenj. Danghnaeuz hagseng youq ndaw hagdangz roxaeuz youq gwnz loh daeuj hagdangz, baema ranz fatseng gijmaz saehcingz, dou aeu aemqdaewz gij cwzyin bw.

Gangjnaeuz lauxsae lajmbanj dwg baujmu, dwg aenvih lauxsae lajmbanj aeu liuhleix hagseng ngoenznaengz youq ndaw hagdangz gwndaenj. Gyangngoenz yaek bang hagseng cawj haeux, bang hagseng faen haeux faen byaek, bang hagseng swiq vanj; gyanghaemh yaek buenx hagseng ninz, bang hagseng bu mbonq, hoemq moeg. Danghnaeuz dwg hagseng lij iq, mbouj rox saeg buh, dou lij yaek bang de saeg buhvaq dem.

Gangjnaeuz lauxsae lajmbanj dwg canghdajcawj, di he hix mbouj loek. Daj bi 2011 seizcou, guekgya

doihengz hagseng yingzyangj gajndeidei giva hwnj, lauxsae lajmbanj dou couh yaek bang hagseng dajcawj gijgwn. Guekgya hawj baux hagseng ngoenz bouj 3 maenz ngaenz daeuj gajndeidei yingzyangj (seizneix ngoenz bouj gaenq hwnj daengz 4 maenz), iugouz 3 maenz ngaenz neix itdingh aeu bienqbaenz gijgwn, hawj hagseng gwn daengz ndaw dungx bae. Vihliux baujcwng guh ndaej daengz, lauxsae lajmbanj dou cij ndaej gag bae gwnz haw cawx haeux cawx byaek, youh gag haeuj ndaw ranzdajcawj, caenn dang dajcawj haeux caeuq byaek hawj hagseng gwn. Seizneix, danghnaeuz mwngz haetromh bae ganj haw, couh yawjraen baux ganj haw ceiq caeux haenx itdingh dwg doih lauxsae lajmbanj dou. Aenvih dou yaek ganj caeux dajcawx, doeklaeng yaek dauqbae hwnjdangz hawj hagseng.

Lauxsae lajmbanj couhdwg

yienghneix, ngoenz bae ngoenz daeuj, souj youq ndaw hagdangz lajmbanj, gyoengqdou lumj aen loekci nei, baenzngoenz baenqlulu, mbouj caengz dingz saek di gvaq. Yienznaeuz gyoengqdou sinhoj, hoeng, gyoengq—dou coengzlaiz mbouj ienqhoij gvaq. Gyoengqdou couh lumj bauxvadruz, soengq buek youh buek hagseng daj dah baiheix daengz dah baihaenx, ndwenngoenz cugciemh nyumx byoem dou hau caez. Danhnyienh, gwnz—biengz gyoengqvunz lai, mbouj dwg bauxboux cungj guh lauxsae, ndigah gyoengqvunz mbouj rox lauxsae miz geijlai baeg. Gyoengq lauxsae lajmbanj dou engqgya sinhoj, aenvih dou cawz le son saw, lij guh haujlai hong caeuq son saw mbouj miz saek di gvanhaeh haenx. Maqmuengh aen sevei raeuz, bauxboux cungj yaek gingq lauxsae, engqgya gingqgyaez gyoengq lauxsae lajmbanj dou.



Mbanjdancou Liuhcouh

Veiz Gozcingh Sangcieng Cawj—guenj Guengjsae Ngeihcib Bi

韦国清上将主政广西二十年

□ Hoz Saubangj sij Cinz Siengzcouh Liuz Gingliuj Cinz Siengzgen hoiz

Veiz Gozcingh gig yawjnaek lajmbanj guh camhdienhraemx. De nyinhnaeuz, rengzraemx Guengjsae fungfouq, gak yienh, se guh suiqli doengzseiz, vanzcienz ndaej giethab guh mbanj camhdienhraemx iq, gajjgez gij vwndiz dangdieg ciuqrongh caeuq gyagoeng nungzfucanjbini yungh dien. De baez daengz aen yienh, ceng mbouj lai cungj aeu cam gizhaenx hwnj le geij aen camhdienhraemx iq, gij yungzliengh canggihi dwg geijlai, lij guh ndaej geijlai aen, baenzlawz gviveh, miz maz gannanz. De daegbied iugou gij dieg “sam sienq”, dangq guh camhdienhraemx iq dwg hangh hongrap youqgaenj daeuj ca. Gwzveijvei Swcigih laebbaenz liux, de lai baez caeuq Cinz Gaihlu, Cai Yungjveiz doxyaeng, daezok gij yienh fanzdwg miz swhyenz rengzraemx, aeu youq geij bi ndawde ceiq noix guh baenz aen camhdienhraemx guzgan siujhingz geij cien cienx doxhwnj he; doengz—

seiz iugouz gij bumwnz cawjguenj dienhraemx swcigih, caenhvaicidingh gij cosih Guengjsae guh camhdienhraemx iq okdaej. De giengzdiuh, itdingh aeu genhgez hengzguh gij cwnqcwz guekgya gvendaengz “byawz guh, byawz guenj, byawz ndaej ndeicawq, couh hawj byawz”. Aenvih caijyungh le gij cwnqcwz caeuq cosih “yungh dien daeuj ciengx dien”, hawj gak gaep engqgya hwnjheiq banh dien, Guengjsae youq mwh “4.5” camhdienhraemx mbefat ndaej gig

vaiq, daengz bi 1975, gij yungzliengh canggihi camhdienhraemx iq daengx gih ndaej 41.5 fanh cienx, miz mbanj yienh lij mbefat baenz gij muengxdienh iq bonjfaenh.

Daihlig mbefat gij dien youz rengz raemx fat doengzseiz, swcigih lij mbefat le mbanj cangjdienhfeiz.

Guengjsae baez daengz mwh raemxmbaet, gij dien youh rengz raemx fat couh deng hanh gig haenq. Veiz Gozcingh cujcanh aeu guh di cangjdienhfeiz, de naeuz: “Gij cangjdienhfeiz hung couh yo youq

gwnz bakgumz meizgvangq gizhaenx, mienxndaej deng daj dieggyae yinh meiz daeuj.”

Cangjdienhfeiz Hozsanh dwg aen daihgingz cangjdienh daih' it youq bakgumz yo Guengjsae, yungh gij meiz cizlieng yaez bonjdieg daeuj fatdienh, bi 1971 daih 1 daiz gihcuj hainduj douzcanj. Mwh Veiz Gozcingh diu ok Guengjsae seiz, aen cangj neix guhgvangq baenz 20.5 fanh cienx.

(caengz sat)